

# Ina regionalisaziun è indispensabla

La mancanza da personal tar ils uffizis dal register funsil è enconuscenta

■ **(anr/ac) Entaifer ils proxims tschintg enfin otg onns cuntanscha la mesadad dad administraturas ed administraturats dals 23 circuls d'uffizis dal register funsil en il chantun Grischun la vegliadetgna da pensiun. Sper la recrutaziun da nov personal vesa la regenza grischuna ulteriura necessitad da regionalisar il servetsch.**

En sia resposta sin la dumonda dal deputà *Reto Löpfé* (pcd Razén) scriva la regenza grischun dad enconuscher la problematica da personal tar ils uffizis dal register funsil en il chantun Grischun. Quai malgrà che las vischnancas sajan responsablas respectiv ils circuls da register funsil. E la regenza grischuna è da l'opinion che las vischnancas sajan pertschertas da la sfida da recrutar personal qualifitgà per quels uffizis. Tenor in giudicament da l'inspecturat dal register funsil sajan tut ils uffizis londervi da chattar soluziuns internas per la successiun da l'administraziun. Novas vacanzas sa dettian uschia tar la substituziun. Las piazzas avertas sajan dad occupar entras scolaziun supplementara da las atgnas forzas da lavur e cun personas adattadas derivantas dad autras professiuns. La tematica da la successiun e da las forzas da lavur vegnia cuntinuadamain discutada entaifer l'Uniuin dals administraturats dals uffizis dal register funsil e l'uniun s'engaschia cun porscher scolaziun adattada als basegns da futurs administraturats dals uffizis. Plinavant vegnian las vischnancas infurmadadas en consequenza da l'inspeziun entras l'inspecturat dal register funsil che succedea mintga dus onns.



**Fa quitads en connex cun la mancanza dad administraturas ed administraturats dals uffizis dal register funsil: Il deputà Reto Löpfé.**

FOTO Y. BÜRKL

## Mancanza tar ils chantuns da la Svizra orientala

La regenza fa vinavant attent a la situaziun da mancanza dad administraturas ed administraturats dals uffizis dal register funsil enconuscenta en bunamain tut ils chantuns da la Svizra orientala. Per prevegnir a quella situaziun haja la regenza stgaffi in'ulteriura opziun da resguardar diploms da la giurisprudenza per administraturas ed administraturats. En passa la mesadad dals chantuns vegnian ils uffizis dal register funsil manads da giuristas e giurists. Plinavant ha la regenza fatg attent a la purschida da scolaziun da

la vart dal chantun e da la branscha. L'alta quota da desditga tar ils davos trais examens per acquistar l'attest da qualificaziun per astgar manar in uffizi dal register funsil attribuescha la regenza per gronda part a mancanza da prativa da candidatas e candidats. Sulet bun la mesadad dals candidats ha dumagnà ils trais davos examens. En la resposta scriva la regenza dad esser persuadida ch'i reusseschia a las vischnancas dad occupar ils posts vacants tar ils uffizis dal register funsil. Optimar ils manaschis cun ina pli ferma regionalisaziun da la purschida vegnia dentant ad esser indispensabel, scriva la regenza.